

西方發願文註



西方發願文註

敘	2
A1 釋題	3
A2 正述願文	6
B1 歸命請加	6
B2 發願回向	7
C1 發願	7
D1 自利	7
E1 發心持名	7
E2 懺悔三障	8
E3 發願	10
F1 總願	10
F2 別願	12
G1 求佛護念	12
G2 正發願	12
H1 現生願	12
H2 臨終願	13
H3 往生願	13
D2 利他	14
F3 總結二願	15
C2 回向	15

敘

或有問於余曰：諸經所載淨土文，總有三篇，其問詞致，咸可宗尚，而師獨於雲棲所作，極口讚歎；又，其文義不為難解，雲棲略注，已自顯然，而師復為之註釋者，何也？

余曰：餘文雖可宗尚，而詞義未周，獨此願文，義周詞備，請申言之。

此一願文，大章有六：

(1)發菩提心，(2)懺悔三障，(3)立四宏誓，(4)求生淨土，(5)回入娑婆，(6)總申回向。

如此六章，始終備足者何？蓋

(1)念佛法門，菩提最要，大心不發，淨土難期。故首之以發菩提心。

(2)心志雖立，惑業尚纏，果報一來，何從得免。故繼之以懺悔三障。

(3)煩惱既淨，業累都蠲，宏誓不堅，修行易退。故申之以四宏誓願。

(4)心願並發，惑業雙消，則三昧可成，九蓮易往。故要之以求生淨土。

(5)但期自利，是名小乘，普願利他，方名大士。故次之以回入娑婆。

(6)自他因果，事理俱圓。故以總申回向終焉。

此之六法，一不可缺。缺一則為人天小果，缺二則受三途惡報，缺三則懈怠易生，缺四則輪回難免，缺五則聲聞獨善，缺六則因果非圓。

餘淨土文，但有求生之願，而無回入之文。

發心立誓，既未彰明；懺悔回向，亦無陳述。故言詞義未周也。

然此願文，雲棲雖解，一往但明大意。其中理致，則蘊而未發。初心鈍根，尚難開解，是以不憚繁文，復為註釋。

蓋此法門，屬於圓教。不明圓理，豈是圓人。苟非圓人，則安發圓願，安修圓行耶。故此注文，言四宏則必歸無作，言回向則舉必具三，無事而非即理，有願皆從稱性。

又，恐末世行人，少諳教義，故諸名相，不敢備述，但取其意，變換其文，祇逗初機，敢聞宿學。

其有因此少文，略通片義，然後而求大乘經典，諸祖著述，方知菩薩修行法門，諸佛成道因果，無不在是，又豈別有一法出於願文之外者哉！

余之所以讚歎而註釋者以此，問者唯唯而退，余因遂理前言，而為之敘。

雍正四年歲次丙午嘉平月之既望

東吳虞山沙彌實賢書於海南蛟門之海雲精舍

釋此西方發願文，大分為二：(1)釋題、(2)正述願文。

A1 釋題

題目五字，有通有別。西方發願，是別名。文之一字，是通名。

就別名中，西方二字，是所發；願之一字，為能發。發字具兼能所。

又，西方是所願之處，願是能發之心。言西方，則該依報正報。言發願，則攝自利利他。依報則七寶莊嚴，圓融四土。正報則彌陀聖眾，一體三身。

四土者：(1)常寂光土、(2)實報莊嚴土、(3)方便有餘土、(4)凡聖同居土。

三身者：法身、報身、應身。應有勝劣，勝則巍巍堂堂，劣則丈六八尺。

問：祇一西方，何分四土？又，祇是一佛，何有三身？得無割裂分張耶？

答：如祇是一月，而有光影不同。

又，如祇是一鏡，而有影像，光明不同。何曾割裂光影，分張鏡像耶？

法身如月，報身如光，化身如影。寂光如鏡體，實報如鏡光，方便同居如鏡影像，在佛則唯一法性身寂光土。為眾生故，現起二身，應下三土。為十地三十心菩薩¹，現圓滿報身，居實報土。為聲聞菩薩，現勝劣二身，居方便土。為凡夫初發心菩薩，現劣應身，居同居土²。

問：此之四土，為同一處，為各異耶？

答：亦同亦異。同則譬如一水，天人魚鬼四見差別。異則各各境界，所處不同。

然上能知下，下不知上。應化亦爾³。

阿彌陀究竟三身，聖眾分得三身，凡夫但有理具而無事用。

此之身土，但約機見差別，故有不同。實則依正不二，體用無差，故曰圓融一體也。

自利，則現生斷惑，後世往生。利他亦爾。

又，言發者，以激動為義；願者，以希求為義。激動，則如箭離弦，勢不中止。希求，則如好美色，如謀重利。乃有始焉發願往生，少焉退惰者，此非發也。

又，有口談淨土，心戀娑婆者，亦非願也。

又，願之一字，具該信行。

信則自他因果，事理不虛⁴。

1 十住、十行、十回向，名三十心。

2 此中身土被機，祇約圓教一往而論，若具明四教，其相千差，恐煩不引。

3 菩薩能應同居方便，聲聞能應同居，凡夫但在同居，不能詣上，故云亦爾。

4 信得自心是佛，他人亦然。念佛為因，往生作佛為果實也。西方是事，離心本性是理。一一真實，故云不虛。

行則專事持名，不雜不散。

願則心心好樂，念念希求。

如此三事，缺一不可。

有信行而無願者，有矣。未有有願而無信行者也。

⑧有人聞說西方淨土，心生好樂，然不念佛，得往生否？

⑨若果心生好樂，定起希求。若起希求，必然念佛。

好樂不希求，定非好樂。希求不念佛，豈是希求。

好樂希求念佛而不往生者，未之有也。

⑩有人於此，亦好亦求亦念，但世間心重，貪戀塵勞，得往生否？

⑪只要將猛，不怕賊強。

若果希求心切，繫念心專，則貪戀雖重，自然漸漸輕微，亦當往生。

如捨銀取金，捨魚取熊掌，則亦何難之有。

第恐願力不敵愛力，佛念不勝欲念，悠悠忽忽，半信半疑，則吾未如之何也已矣。

⑫為善生天，作惡入地獄，本不發願。念佛往生，亦復如是，何須待願而後生耶？

⑬三界因果，隨業所感，固不待願而成。

求生西方，出世正因，若無大願要期，縱然念佛，決不成就。

譬如牛行熟路，雖無御者，亦知歸宿。如行生路，決無趨向，必須御者手執繩頭，復加鞭策，然後方行。

眾生心性如牛，三界如熟路，西方如生路，願如御者，信如手，念似繩頭，誓如鞭策，往生如行路，無願不生，如牛無御。故，必以發願為要也。

⑭信行願三，既聞命矣，但十方皆有佛國，何須獨願西方？

⑮以彼土中阿彌陀佛，與此土眾生，深有因緣，諸佛不爾。是以專求彼國，不願餘方。

又，彼土中依報正報，超過十方。諸佛所讚，不唯凡夫願往，菩薩亦然。不唯此方願往，餘方皆然。

既無八難三途，亦無三毒八苦，衣食自然，壽命無量，水鳥樹林皆能說法。聲聞大士其數甚多，諸上善人俱會一處。所以《阿彌陀經》中，釋迦如來苦口叮嚀：「汝等眾生！應當發願，願生彼國」也。

⑯祖師云：智者知心是佛，愚人樂往西方。由是而言，則愚人只好念佛，智者固宜參禪。若概勸往生，恐違祖意，非通論也。

8 ③若言往生是愚，則從上諸祖，蓮社高賢，乃至馬鳴、龍樹、文殊、普賢，亦皆愚耶？亦不知心耶？當知盡理而言，唯佛一人稱為智者，餘皆是愚。若就事論，乃有千差，談何容易。嗚呼！祖師破人執有，故發此言。今汝執空，因藥致病。不知有病易遣，空病難除。天下至愚，非汝而誰。

④古有發願來生，生逢中國，長遇明師，正信出家，童真入道者，此復云何？

⑤在昔像教方隆，人根尚利，明師易得，入道非難，縱現世未明，來生可望，故發此願也。

今則不然，佛法愈衰，人根愈鈍；邪多正少，退易進難；內障外魔，無人不具；明師善友，希世難逢。但見出家滿地，未聞得道何人。累劫未成，後生寧致。青公哲老，敗轍昭然。《大集》懸記，可為誠證⁵。

乃有不知利害，妄效古人，仍發此願者，過矣。

且，言中國，則孰如安養。言明師，則孰愈阿彌陀。言出家，則孰若橫超三界。言入道，則孰若花開見佛，悟無生忍。不是之願而願娑婆。我信是人，誠為愚執。

16 ⑥求生西方，固所願也。但我下劣凡夫，罪業深重，福善輕微，如何容易得生安養？

⑦餘門學道，須賴行人自力。念佛往生，全賴阿彌陀願力。

自力難故，累劫未成。他力易故，一生可致。是以一日七日，便得往生。十念一念，亦能見佛。縱十惡罪人，佛亦不棄，況十善凡夫。一生發願念佛，而不得往生乎！

且一稱洪名，滅罪八十億劫，何疑業重。暫持聖號，勝於布施百年，何慮福輕。但辦信心，決不相賺。

24 ⑧兜率內院，近在此界，又有補處菩薩於中說法，亦可上昇，親近大士。何須近越此方，遠超他土？

⑨西方淨土，是仗阿彌陀願力，接引往生，故雖遠而易屆。兜率內院，要賴行人定力，方得上昇，故雖近而難生。苟無禪定，是無翅欲飛，求昇反墜矣。且彼天欲樂，初心尚迷，西域三人，可為殷鑒⁶。

⑩東方藥師佛國，依正莊嚴與西方無異。又有八大菩薩臨終示路，亦可往生，何須定願西方淨土？

5 大集經云：後五百歲中，億億人修行，無有一人得道，唯依念佛法門得度生死。

6 西域記云：無著、世親、師子覺兄弟三人，發願同生兜率見彌勒佛，約以先去上生，必來相報。後，師子覺先逝，杳無消息。世親繼歿，復隔一年，方來報語。無著問曰：生兜率否？答曰：已生，親見彌勒。又問：師子覺何在？答曰：彼生外院，耽著欲樂，不見菩薩，是以不來相報。故知小菩薩尚爾，何況凡夫，安可不知利害。

8 ⑧藥師一經，主於消災延壽，不專勸往生。其言菩薩示路，是為一類不定善根眾生，欲隨方受生供佛聞法者，此人福慧具足，所願皆得。故聞藥師佛名，隨念即生彼國，八大菩薩特為示路，指歸其處耳。亦非一定往生彼國也。故曰：或有因此生於天上，及生人間，為輪王而攝四洲，安四民於十善。此非福慧具足而能之乎？

今阿彌陀佛國，專勸往生，諸經廣談，十方咸往。

阿彌陀聖眾，垂手提攜；釋迦諸佛，讚歎護念。而乃捨通途而行局路，執暫語以廢常談。東西既無定向，持念又復不一；既無福慧，又鮮神通；未得隨生，翻成莽蕩，可弗審歟！

今欲一其志念，專其趣向，不歸安養，將安歸耶？

專其趣向，故曰西方。一其志念，故曰發願。文者，能詮章句也。

又，願有通別：通則四宏誓願，別則隨心所發種種誓願。

又，通則皆名為願，別則菩提名發心。四宏名發誓，求生西方名發願。

又，回向亦名為願，如花嚴十回向文，一一皆云願眾生等是也。

16 又，求生西方，總攝一切菩提誓願，及十方三世一切佛法，無有遺餘，故以此題而冠篇首也。

然此願文，事理周備，行願深廣，諸有智者當味其言，力行其事，庶幾自他俱利，因果皆成，不徒為文字語言音聲唱和而已。

初釋題目竟。

A2 正述願文

願文為二：(1)歸命請加，(2)發願回向。

B1 歸命請加

稽首西方安樂國 接引眾生大導師 我今發願願往生 惟願慈悲哀攝受

24 偈文初二句是歸命，後二句是請加。

發願之始，必先歸命於佛者，所以求證此心也。

稽首者，禮佛之儀式，謂以頭著地，稽留少頃而起，故名稽首，表敬之極也。

西方安樂國，是依報。接引眾生大導師，是正報。

言安樂國者。無八苦故名安，無三毒故名樂，法王所統名為國。

言接引者，眾生沒在苦海，佛以智手接之令出。眾生著於五欲，佛以種種樂事誘之令離，故曰接引。

32 言導師者，導人以正道也。眾生顛倒，以苦為樂，以邪為正，不知出要。佛

為分別娑婆是苦，西方是樂，令起欣厭，發願往生，故名導師。

外道，不知邪正，妄立宗徒，是師非導。聲聞，能出三界，不化眾生，是導非師。菩薩，能化眾生，雖是導師，不名為大。唯有阿彌陀世尊，乘大願船，入生死海，不著此岸，不居彼岸，不住中流，而導眾生到於彼岸。

如是利益，徧於十方，盡於三世，無暫休息。是故，獨稱為大導師也。

我今願往，是自迷己懷。惟願攝受，是請求加護。愛念名慈，憐愍名悲，如母念子，心無捨離，是名攝受。

初歸命請加竟。

B2 發願回向

有二：(1)發願，(2)回向。

C1 發願

又二：(1)自利，(2)利他。

D1 自利

又三：(1)發心持名，(2)懺悔三障，(3)發願。

E1 發心持名

弟子（某甲）普為四恩三有法界眾生，求於諸佛一乘無上菩提道故，專心持念阿彌陀佛萬德洪名，期生淨土。

普為四恩等，是所緣之境。求於諸佛等，是能發之心。專心持念等，是所念之佛。期生淨土，是所望之處。

蓋發菩提心，必先緣境。若無此境，則心無所依，亦無所發。

然，境有廣狹遠近不同，四恩狹而最近，三有居中，法界眾生則遠而復廣。

境既如此，心亦復然。必先從親至疏，由近及遠也。

言四恩者，在家則天地君親師，出家則父母師僧國王檀越。

言三有者，即是三界，謂欲界、色界、無色界。隔歷不同曰界，因果不亡曰有。此三界中，即六道四生住處，舉依報以該正報也。

法界眾生，即十方無量世界一切眾生，亦即九法界眾生。

非二非三故名一，運載眾生故名乘，無上非有上，菩提者能覺之智也。

言不但專為自利，乃欲普為四恩。又，不但為四恩，亦欲普度六道四生。

又，復不為一三界六道四生，乃是普為十方無量世界一切眾生。欲令度脫，使其皆得一乘無上菩提之道，故發此心也。

專心者，不雜餘事。持念者，受而不忘。一名而具萬德，故云萬德洪名。期者，望也。無有五濁，故名淨土。

蓋念佛而不發大菩提心，不與阿彌陀佛本願相應，終不往生。

雖發菩提心，不專念佛，亦不往生。

故必以發菩提心為正因，念佛為助緣，而後期生淨土。修淨業者不可不知。

E2 懺悔三障

又，以業重福輕，障深慧淺，染心易熾，淨德難成。

今於佛前，翹勤五體，披瀝一心，投誠懺悔。

我及眾生，曠劫至今，迷本淨心，縱貪瞋癡。染穢三業，無量無邊。所作罪垢，無量無邊。所結怨業，願悉消滅。

又以下，明懺悔之因。今於下，明懺悔之法。我及眾生下，正陳懺悔。

此一段文，承上文言。

雖然念佛發心期生淨土，而我罪業厚重，福善輕微。障緣既深，智慧復淺，染污心識，如火熾然，清淨功德，一無成就。興言及此，焉不悲傷！

蓋末世凡夫，鈍置如此。如此罪障，能障行人，不得往生，將如之何，此懺悔之宜急務也。

言業重福輕者，業即十惡，福即十善。言十惡者，身有三，謂殺、盜、淫；口有四，謂妄言、綺語、兩舌、惡口；意有三，謂貪、瞋、癡。翻此十惡，則名十善。言重，則十惡具造；言輕，則一善單修。又，上品十惡名業重，下品十善名福輕⁷。

又，熾然作惡名業重，泛然行善名福輕。乃有瞋他，則呪其速滅；杖彼，則立使隨亡。此業重也。

又，或方才念佛，便謂口酸；適欲禮拜，又言腰痛。此福輕也。

言障深慧淺者，障有二種：(1)外障，(2)內障。

外障有二：(1)塵緣逼迫，(2)魔外牽纏。

內障復二：(1)疾病夭殤，(2)愚癡顛倒。

慧有二種：(1)方便慧，(2)真實慧。聞思修為方便，見道為真實。

見道有二：(1)小乘，(2)大乘。

大乘所見，復有二種：(1)空、假，(2)中道。

中道復二：(1)但中，(2)圓中。

若就諸慧論深淺者，聞慧為淺，思慧為深；乃至但中為淺，圓中為深，傳傳互論可知。

言障深，則內外交攻；言慧淺，則聞熏薄解。乃有甫欲修行，便生惡疾；纔

⁷ 如十惡業，殺生則以父母師僧為上，餘人為中，畜生微細，昆蟲為下。餘皆例此，可知十善。反此，可以意得。

能向道，適遇邪師。此障深也。

又，有未得內凡，便謂已超佛地；稍通世智，自言已入悟門。此慧淺也。

貪瞋癡名染心，戒定慧名淨德。

言易熾者，瞋如火燄，觸乾草而展轉增高；愛似藕絲，割鈍刀而牽連不斷；癡則密織見網，愈縛愈纏；深種邪根，彌生彌廣。

言難成者，戒則律儀篇聚，持少犯多；定則大小禪那，造修無地；慧則權實妙智，證悟無門。乃有一毫染著，累月牽懷，片語不投。

8 終身結怨者，此易熾也。

其或才登戒品，已破浮囊；一入禪堂，但增昏掉者，此難成也。自非深生慚愧，痛自剋責，懇到懺悔，則縱經塵劫，滅罪良難。

次，懺悔法中：翹勤五體，表外儀恭；披瀝一心，明內心敬。

兩肘、兩膝，及額，名為五體。披瀝謂開發洗蕩也。以我之誠，歸投於佛，故曰投誠。懺悔者，斷相續心也。

由昔身行惡法，故今五體翹勤。復由意起貪瞋，故用一心披瀝。又，由舌談惡語，故今口陳懺悔。

16 又，昔無始，身業猛利，故用翹勤而懺。意業穢污，故用披瀝而懺。口業粗獷，故用陳詞急切而懺也。

次，正陳懺悔中，我者，行人自謂。眾生，即四恩三有六道四生。謂我與法界眾生，自從曠劫，直至今生，常常起惑造業，未曾休息。非是一人獨造，亦非一生一處所造。非是一人，故云我及眾生。非是一生，故云曠劫至今。非是一處，故云無量無邊。

蓋由眾生，從無始來，世世生生，互為眷屬，更相主伴，更相佐助，罪業方成。造業既同，懺悔亦爾，故須徧緣法界眾生為其懺悔也。

24 ①問曠劫罪業，應已受報，云何直至今生，猶未滅耶？若已受報，則不須懺，若猶不滅，則懺亦無益？

②答眾生造業，受報有三：(1)現報，(2)生報，(3)後報⁸。

復有二種：(1)定業，(2)不定。若過去業屬現報者，則亦已受；若生報後報，正在將來。豈可不殷勤懺悔邪？

又，若是定業，則不可懺；若不定者，懺則除滅，何謂無益耶⁹？

迷本淨心二句，是懺煩惱障。染穢三業四句，是懺業障。所結怨業二句，是

⁸ 現報，一生即受；生報，次生方受；後報，經無量劫乃受。

⁹ 小乘所明，有定、不定業，大乘所明，一切不定。

懺報障。

又，迷本淨心，是根本惑；縱貪瞋癡，是枝葉惑。

言迷，則如雲覆月，光明不現；言縱，則養賊為子，自劫家珍。

身口意三，與煩惱相應，名為染穢。造作十惡五逆，名為罪垢。

三業為能造，罪垢為所造。罪垢既成，必招怨業，怨必有報，故名報障也。

言無量無邊，略有五意：

(1)約心。一念塵勞，具有八萬，何況相續；

(2)約境。一處所作，已自無量，何況十方。

(3)約事。一業若成，罪無邊際，何況諸業。

(4)約時。一生所作，亦應無量，何況曠劫。

(5)約人。一人所作，已自無邊，何況眾生。

所以業若有形，虛空難受也。

怨業有三：如云

人死為羊，羊死為人，死死生生，遞相吞啖。此名殺怨。

汝負我命，我還汝債，經百千劫，常在生死。此名盜怨。

汝愛我心，我憐汝色，經百千劫，常在纏縛。此名淫怨。

①問淫則彼此無怨，何亦名怨？

②答殺盜二業，名為怒怨；淫名喜怨。喜怒俱怨，無非是業。眾生顛倒，以怨為親，良由於此。

願悉消滅者，謂三障俱滅也。

懺悔三障竟。

E3 發願

有三：(1)總願、(2)別願、(3)總結。

F1 總願

從於今日，立深誓願：遠離惡法，誓不更造；勤修聖道，誓不退惰；誓成正覺，誓度眾生。

此即四宏誓願也。修行若無誓願，則有退失，故以此四法自制其心，則不生懈怠也。

此之四宏，依於圓教無作，四諦而發，名深誓願。願不依諦，名為狂願。若非無作，亦不名深。

言無作者，謂本性具足，四皆無所造作也。

天台大師云：由迷理故，涅槃是生死，名為苦諦；菩提是煩惱，名為集諦；

由悟理故，生死即涅槃，名為滅諦；煩惱即菩提，名為道諦。

今略釋之，生死煩惱是眾生因果，菩提涅槃是諸佛因果。然眾生、諸佛，但有名字；生死煩惱、菩提涅槃，亦但有名字。究極而言，祇是一心。以由無始迷此一心，全以菩提涅槃而為煩惱生死。故於今日悟此一心，即以煩惱生死而為菩提涅槃。名雖有二，體則無二。如水成冰，冰還成水。此即無作四諦也。

⑩眾生、諸佛，但有名字，則誠然矣；生死煩惱，是染穢法；菩提涅槃，是清淨法，升沉迥異，優劣天淵，云何言亦但有名字耶？

8 ⑪若就事論，誠如所說。若約理論，一一皆無實法。

喻如梨園子弟，扮作貧兒，身行丐食，意起希求；須臾，又扮帝王，身登九五，意生歡悅。有智慧者，不應於是而生實想，謂有貴賤高卑之異。生死煩惱、菩提涅槃，亦復如是，凡夫謂實，諸佛聖人知其非真。

⑫生死煩惱不實可也，若菩提涅槃亦非真實，何須辛苦修證耶？

⑬所言非真，但破執著，不言修證亦無；若執非真，反成邪見矣。乃有身犯律儀，口談玄妙，以念佛為愚夫，以修持為著相，此末世聰明人參禪大病，不可不知。

16 今言遠離惡法，誓不更造，即是煩惱無盡誓願斷，此依集諦發心。

勤修聖道，誓不退惰，即是法門無量誓願學，此依道諦發心。

誓成正覺，即是佛道無上誓願成，此依滅諦發心。

誓度眾生，即是眾生無邊誓願度，此依苦諦發心。

文雖不次，義無二也。

云何依於苦諦發心？謂觀眾生為生老病死之所逼迫，生大苦惱，以是因緣，發誓願云：我當早度生死，亦度無量眾生得出生死。生死即所觀苦諦，因觀生死，故願度脫。是名依苦諦發心。

24 云何依於集諦發心？謂觀眾生為貪欲瞋恚愚癡邪見之所惱害，不能自拔，以是因緣，發誓願云：我當自斷煩惱，亦斷眾生無量煩惱，令得解脫。煩惱即所觀集諦，因觀煩惱過患，故欲斷除。是名依集諦發心。

云何依於滅諦發心？謂觀諸佛已滅煩惱，得解脫樂，具有無量神通自在。而諸眾生，不覺不知，妄受諸苦。以是因緣，發誓願云：我當勤修方便，得大涅槃寂滅之樂，亦令眾生同得此樂。涅槃佛果，即所觀滅諦；因觀佛果，故有希求。是名依滅諦發心。

32 云何依於道諦發心？謂觀六度萬行恒沙法門，具有無量稱性法樂，而諸眾生不習不修，妄造諸業，以是因緣，發誓願云：我當精勤修學無量法門，亦令眾

生修學是法。法門即所觀道諦，因觀法門，故願修學。是名依道諦發心也。

然此祇是事相，若知理性具足，則四皆無作。云何無作？謂眾生是假名，度無所度。煩惱無實性，斷無所斷。法門無具足，學無所學。佛道本現成，成無所成。此名無作四宏誓願，依於無作四諦而發也。

F2 別願

有二：(1)求佛護念，(2)正發願。

G1 求佛護念

阿彌陀佛，以慈悲願力，當證知我、當哀愍我、當加被我。

願禪觀之中，夢寐之際，得見阿彌陀佛金色之身，得歷阿彌陀佛寶嚴之土，得蒙阿彌陀佛甘露灌頂、光明照身、手摩我頭、衣覆我體。

阿彌陀佛下，明護念之心。願禪觀下，明護念之事。

諸佛心者，是大慈悲。以慈悲故，則有誓願。以誓願力，則當證知。由證知故，復當哀愍。以哀愍故，必應加被。此阿彌陀佛護念之心也。

禪觀謂十六觀。始從日觀，乃至九品往生。或具觀十六，或專一觀。言一觀者，且指總觀。謂觀己身坐蓮花中，作蓮花開合想。蓮花開時，佛及聖眾俱放光明，來照我身；水鳥樹林皆演妙法，此名總觀。或但觀丈六佛相在池水上，垂手提攜，己身胡跪花中，亦可。

問今既專持名號，云何復令觀想？

答終日持名，暫時觀想。

以觀助念，念則不散，縱令心粗境細，亦可託像而觀，復何礙乎！

禪觀是醒時，夢寐是睡時，或醒或睡，皆得見佛。若不觀想，則見佛為難。

問觀中見佛，得無魔事否？

答參禪人本不念佛，而佛忽現，此則心境相違，名為魔事。

念佛人本自觀佛，佛隨相現，此名感應道交，非魔事也。

然須了知，所見之佛，如水中月，非有非無，不可取著。若生取著，則恐反成魔事，切宜慎之。

金色身，是正報。寶嚴土，是依報。歷，是經歷。寶嚴者，七寶莊嚴也。餘文可解。

G2 正發願

有三：(1)現生願、(2)臨終願、(3)往生願。

H1 現生願

使我宿障自除、善根增長、疾空煩惱、頓破無明、圓覺妙心廓然開悟、寂光

真境常得現前。

由甘露灌頂，故宿障除。由光明照身，故善根長。由手摩我頭，故煩惱無明頓破。由衣覆我體，故妙心真境現前。

宿障，指惑業苦三障。善根，即戒定慧根。

昏煩之法，惱亂心神，名為煩惱，指見思惑。於第一義諦不了，名曰無明，指根本惑。由此二惑，故妙心真境不能顯現。今二惑頓空，故開悟現前也。

圓覺是能證智，寂光是所證理。現前者，洞然明白也。

H2 臨終願

至於臨欲命終，預知時至。身無一切病苦厄難，心無一切貪戀迷惑。諸根悅豫，正念分明，捨報安詳，如入禪定。

阿彌陀佛與觀音、勢至、諸聖賢眾，放光接引，垂手提攜。

樓閣幢幡、異香天樂、西方聖境，昭示目前。

令諸眾生，見者聞者，歡喜感歎，發菩提心。

臨命終時，第八識將去時也。三日七日，為預知。

四大不調，名病苦。水火刀兵毒藥等，名厄難。

貪戀有四：(1)終歲持齋，一朝食肉；(2)長年念佛，此日貪生；(3)恩愛牽纏，難割難捨；(4)許願保禳，求神服藥。

迷惑有三：(1)疑罪業深重；(2)疑功行淺薄；(3)疑佛不來迎。

諸根，即眼等五根。正念，是意根。

無病無難故悅豫，無貪無惑故分明。捨所受身名捨報，不忙不亂故安詳。坐脫立亡，故云如入禪定。

阿彌陀佛下，明感應道交。令諸眾生下，明見聞利益。如文可知。

H3 往生願

我於爾時，乘金剛臺，隨從佛後。如彈指頃，生極樂國七寶池內勝蓮花中。

花開見佛，見諸菩薩，聞妙法音，獲無生忍。

於須臾間，承事諸佛，親蒙授記。得授記已，三身四智五眼六通、無量百千陀羅尼門，一切功德皆悉成就。

金剛臺，即蓮花座，其座金剛所成，故名金剛臺。又花內蓮房，亦名為臺。上品上生，乃有此臺。

如彈指頃，言往生之速也。勝蓮花，即金剛臺上之花。

無生忍者，一切諸法，本自不生不滅，眾生顛倒，妄見生滅，今以智慧而了達之，故云獲無生忍。得此忍已，便登初住，大用現前。

承事諸佛下，正明其相。

三身者，法身、報身、化身。

四智者：一大圓鏡智、二平等性智、三妙觀察智、四成所作智。

五眼者：肉眼、天眼、慧眼、法眼、佛眼。

六通者：天眼、天耳、他心、宿命、神足、漏盡也。

陀羅尼，翻總持，謂總一切法，持無量義也。

一切功德句，總結上文。皆悉成就者，是初住分成就，非究竟成就也。

初自利竟。

D2 利他

然後，不違安養，回入娑婆，分身無數，徧十方刹。以不可思議自在神力，種種方便，度脫眾生，咸令離染，還得淨心，同生西方，入不退地。

問菩薩化他，不於淨土而於穢土者，何也？

答以淨土中人，有善無惡，化度則易。穢土惡多善少，化度則難。難故，大悲增長，行願堅牢。易故，悲心不深，行願不廣。大阿彌陀經云：此土修行一日，勝於西方淨土修行一劫者，蓋謂此也。

又，此娑婆是本昔受生之處，有緣必多，化度宜急。所以生淨土後，必先回入。

問逕在此土化導，有何不可，何須捨此趨彼，然後回入？

答若不捨此，則墮落有分，化導何從。若不往彼，則自利未能，利他安保。喻如貧人未見帝王，未蒙官職，則自尚飢寒凍餒之不暇，又焉能周給鄰里鄉黨乎。故知不願度生則已，願則必求生西方。不生西方則已，生則必須回入。

問適欲往生，又欲回入，得無進退躊躇，志不決定耶？

答先期自利，故願往生。後願利他，故須回入。

發心雖在一時，行事則有先後。若不先發此意，一生淨土，回入則難。

其如四恩三有，何故知未得往生，決無復入胞胎之念。既生安養，決無不來化導之心。此正明決定，何謂不定耶？

言不違安養者，法身不動也。言回入娑婆者，化身應現也。如一月千江，不升不降，從體起用，亦復如是。

非獨一國，亦徧十方，種熟脫三，番番不息。

小乘外道作意神通，名可思議。一心作一，不能作多，名不自在。

菩薩不爾，不消作意，化化無窮，故名不可思議自在神力也。

慳貪者，以財施攝；剛強者，以愛語攝；為善者，以利益攝；行惡者，以同

事攝，故名種種方便。

使其三惑不起，名為離染。三德圓證，名為淨心¹⁰。

咸令離染二句，是現世益。同生西方二句，是後世益。

不退有三：(1)位不退，終不退為凡夫二乘；(2)行不退，決無退失所修行業；(3)念不退，決無一念忘失錯誤。

又，一入西方，縱在疑城邊地，下品下生，終不退入三途，故總名不退也。

⑩西方不退，設使回入娑婆，還有退否？

8 ⑪如上所明，三身四智，種種現前。加以阿彌陀護念、諸佛攝受，焉有退失之理。喻如衣錦還鄉，順風搖櫓，無求不利，無往不前。菩薩度生，所以必欲求生西方，而後回入者，良由於此。

F3 總結二願

如是大願，世界無盡、眾生無盡、業及煩惱一切無盡，我願無盡。

如是大願，總結前文。世界無盡等是舉例，我願句總顯無盡。如云世界不可盡，我願不可盡；眾生不可盡，業及煩惱不可盡，我願不可盡；若四種可盡，我願乃可盡。

16 ⑫何故發此無盡不願耶？

⑬以由心無盡故，隨心所發誓願，亦無有盡。

又，世界等四，並由心具，縱然成佛，亦無可盡之理。

⑭願既無盡，成佛何時？

⑮所言成佛，祇是識得自心，究竟不生耳。至於三十二相，方便施為，本非真實，尚何成與不成之可論哉。

初發願竟。

C2 回向

24 願今禮佛、發願、修持功德，回施有情。

四恩總報，三有齊資，法界眾生，同圓種智。

菩薩修行，必先回向者。以若不回向，則是人天果報；若能回向，則成出世正因故也。

回向有三：(1)回己向他；(2)回因向果；(3)回事向理。

云何回己向他？以由眾生，無始時來，所修善業，並為己身及己眷屬，今回此心向於眾生，以己所修，悉施於彼，願他得利，不求自樂，是名回己向他。

云何回因向果？以無始來，但為人天福報，不求出世實果。今回此心向於無

¹⁰ 見思、塵沙、無明，為三惑。法身、般若、解脫，為三德。

上菩提，所修善業，悉用莊嚴佛果，是名回因向果。

云何回事向理？若見有眾生、諸佛、善法、回向，種種差別，則事不空。今回此心向於實際，能修所修，能向所向，二俱寂滅，是名回事向理。

今言恩有齊資，是回己向他。同圓種智，是回因向果。此二並是事相。理在事中，故三皆具足。種智者佛之智慧也，謂能知諸法一相，亦能知種種相無二無別，故名種智也。

⑩所修善業，雖有若無，名不住相。今一事甫畢，汲汲回向，不已著乎？

8 ⑪汝言善不住相，為有後報否？若無，則墮斷滅；若有，則雖不求福，福還隨汝。人天果報，固未免離，云何無著？今以此福，回施眾生及以諸佛，則成無漏勝因，何著之有！

⑫回施眾生，眾生實得利益否？

若無利益，則成虛妄；若有利益，則我作他受。焉有此理？

⑬菩薩福德，與眾生共。現在雖無利益，未來成佛，則眾生受賜。

如阿彌陀佛國，凡未生者，即同佛受用，並由世尊因地作福，回施我等。是故，今日得其果報，如父財子用，孰曰不可乎。

16 ⑭回向與不回向，功有勝劣。事有得失否？

⑮回向，則少福成多，如一滴投海，不可分別。不回向，則多福轉少，如水灌漏卮，須臾即盡。

又，若能回向，則心能轉福，逕往西方。若不回向，則心被福牽，還生三界。以修淨業人，凡有一善，必先回向西方者，蓋以此也。

⑯回向西方，則自求快樂；回向佛果，則自求尊勝。由來為己，何與眾生？

⑰苟不為人，則何須作佛。如不因治亂，焉用求王。當知利人必先自利，成己即是成他，尚何彼此分別之有哉。

24 ⑱眾生本空，菩提非有；不見善法，將何回向？

⑲雖知三事俱空，而眾生不解。妄造諸業，妄受諸苦。是故，菩薩以善法而回向之。又，欲成佛而度脫之，不廢修持因果耳。若執俱空，則反成偏見，墮入二乘斷滅深坑矣。是知，具足三種回向，是菩薩修行要行，不可不知。

略釋願文竟。

受持及讀誦 讚歎並宣說 福慧俱增長 災障悉消除 現眷咸安康 先親得超昇 見聞與隨喜 皆共成佛道



香港新界屯門藍地青山公路18號妙法寺 <https://www.mfbm.hk>
18 Castle Peak Road, Lam Tei, Tuen Mun, N.T., Hong Kong